

BOSNA I HERCEGOVINA  
FEDERACIJA BOSNE I HERCEGOVINE  
TUZLANSKI KANTON  
OPĆINSKI SUD U TUZLI  
Broj: 32 0 St 429890 22 St  
Tuzla, 28.04.2023. godine

Općinski sud u Tuzli, stečajni sudija Vedran Milašinović, u stečajnom postupku nad dužnikom „FARMACOP“ d.o.o. Čelić, za proizvodnju, trgovinu i usluge, ul. Vražići bb, sa podružnicom „FARMACOP“ d.o.o. Čelić, za proizvodnju, trgovinu i usluge, Koraj bb, Lopare, dana 28.04.2023. godine, donio je sljedeće:

### RJEŠENJE

Odbacuje se prijava potraživanja Emine (Omera) Delić iz Tuzle podnesena dana 26.04.2023. godine.

### Obrazloženje

Rješenjem Općinskog suda u Tuzli broj: 32 0 St 429890 22 St od 11.11.2022. godine, pokrenut je prethodni postupak radi utvrđivanja uslova za otvaranje stečajnog postupka nad imovinom društva „FARMACOP“ d.o.o. Čelić, za proizvodnju, trgovinu i usluge, ul. Vražići bb, sa podružnicom „FARMACOP“ d.o.o. Čelić, za proizvodnju, trgovinu i usluge, Koraj bb, Lopare, a za privremenog stečajnog upravnika imenovana je Maja Musemić iz Tuzle.

Odredbama člana 102 Zakona o stečaju (Objavljeno u "Sl. novine FBiH", br. 53 od 07 jula 2021) je propisano da ako imovina stečajnog dužnika ne pokriva troškove postupka, a prijedlog je dopušten i osnovan, stečajni sudija će javnim pozivom, objavljenim na oglasnoj tabli suda, web stranici suda - elektronskoj tabli suda i u "Službenim novinama Federacije BiH", pozvati povjerioce i zainteresirana lica da u roku od 30 dana od dana objavljivanja poziva predlože otvaranje stečajnog postupka i uplate predujam za obezbjeđenje troškova stečajnog postupka, u iznosu koji odredi stečajni sudija (stav 7), a ako u roku iz stava 7 ovog člana povjerioci i zainteresirana lica ne predlože otvaranje stečajnog postupka i ne uplate predujam, stečajni sudija će otvoriti stečajni postupak i odmah zaključiti postupak (stav 8).

Sud je rješenjem od 26.01.2023. godine pozvao predlagača, povjerioce i sva zainteresovana lica da u roku od 30 dana od dana objavljivanja poziva u službenim novinama uplate određeni novčanih iznos na ime predujma troškova otvaranja stečajnog postupka, u smislu odredbe člana 102 stav 7 Zakona o stečaju, a koje rješenje je objavljeno u Službenim novinama F BiH broj 11/23 dana 15.02.2023. godine. Kako niko nije predložio otvaranje stečajnog postupka i uplatio novčana sredstava radi predujma troškova postupka, sud je rješenjem od 11.04.2023. godine otvorio i istovremeno zaključio stečajni postupak nad dužnikom, u skladu sa odredbom člana 102 stav 8 Zakona o stečaju.

Emina (Omera) Delić iz Tuzle je dana 26.04.2023. godine podnijela prijavu potraživanja protiv stečajnog dužnika u ukupnom iznosu od 2.566,65 KM.

S obzirom na tok ovog postupka, da bi bio otvoren stečajni postupak nad dužnikom, bilo je potrebno u roku od trideset dana od objave rješenja od dana 26.01.2023. godine u Sl. novinama FBiH da se stečajni povjerilac kod stečajnog suda legitimiše kao stečajni povjerilac, predloži otvaranje stečajnog postupka i uplati novčana sredstva radi predujma troškova otvaranja stečajnog postupka.

S obzirom da je navedeni rok protekao, a da niko nije predložio otvaranje stečajnog postupka i predujmio novčana sredstva za otvaranje stečajnog postupka, što je za posljedicu imalo zaključenje stečajnog postupka, to se predmetna prijava potraživanja podnesena 26.04.2023. godine ima odbaciti kao

neblagovremena, jer je ista podnesena nakon što je sud rješenjem zaključio stečajni postupak, te je temeljem odredbe člana 177 stav 6 Zakona o stečaju odlučeno kao u dispozitivu ovog rješenja.

Stečajni sudija  
Vedran Milašinović

Pouka o pravu na izjavljivanje pravnog lijeka:

Protiv ovog rješenja podnosilac prijave potraživanje može izjaviti žalbu u roku od osam dana od dana dostavljanja, koja se podnosi Kantonalnom sudu u Tuzli, a putem Općinskog suda u Tuzli.